

## თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილება - სტანდარტული ოპერაციული პროცედურები

### მუხლი 1. თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილება

1. თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილება საქართველოს ოკუპირებული ტერიტორიებიდან იძულებით გადაადგილებულ პირთა, განსახლებისა და ლტოლვილთა სამინისტროს მიგრაციის, რეპატრაციისა და ლტოლვილთა საკითხების დეპარტამენტის თავშესაფრის საკითხთა სამმართველოს სტრუქტურული ერთეულია.
2. თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილება შედგება წარმოშობის ქვეყნის შესახებ ინფორმაციის კვლევის სპეციალისტებისა და განყოფილების უფროსისგან, რომელიც ასევე არის წარმოშობის ქვეყნის შესახებ ინფორმაციის კვლევის სპეციალისტი.
3. წარმოშობის ქვეყნის შესახებ ინფორმაციის კვლევის სპეციალისტი სტატუსის დამდგენ სპეციალისტებს და თავშესაფრის პროცედურაში ჩართულ მხარეს აწვდის ინფორმაციას თავშესაფრის მაძიებელი პირის წარმოშობის ქვეყნის შესახებ (მოქალაქეობის არ მქონე პირის შემთხვევაში, პირის მუდმივი ბინადრობის ქვეყნის შესახებ).
4. თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილება, კომპეტენციის ფარგლებში, მოქმედებს „საერთაშორისო დაცვის შესახებ“ საქართველოს კანონით და საქართველოს სხვა კანონმდებლობით დადგენილი წესის შესაბამისად.

### მუხლი 2. წარმოშობის ქვეყნის შესახებ ინფორმაცია

1. წარმოშობის ქვეყნის შესახებ ინფორმაცია გამოიყენება საერთაშორისო დაცვაზე განცხადების განხილვისას და არ წარმოადგენს სახელმძღვანელო პრინციპებს სტატუსის დამდგენი სპეციალისტებისთვის, თუმცა წარმოშობის ქვეყნის შესახებ ინფორმაცია ეხმარება სტატუსის დამდგენ სპეციალისტებს შეფასების პროცესში.
2. „საერთაშორისო დაცვის შესახებ“ საქართველოს კანონის 30-ე მუხლის პირველი პუნქტის და 36-ე მუხლის პირველი პუნქტის „ა“ ქვეპუნქტის თანახმად, დასკვნა თავშესაფრის

მინიჭების ან თავშესაფრის მინიჭებაზე უარის თქმის შესახებ, სხვა კომპონენტებთან ერთად, ეფუძნება თავშესაფრის მაძიებელი პირის წარმოშობის ქვეყნის შესახებ ინფორმაციას.

3. წარმოშობის ქვეყნის შესახებ ინფორმაცია მოიცავს თავშესაფრის მაძიებლის ან საერთაშორისო დაცვის მქონე პირის წარმოშობის ქვეყნის (მოქალაქეობის არ მქონე პირის შემთხვევაში ყოფილი მუდმივი ბინადრობის ქვეყნის) შესახებ შემდეგ ინფორმაციას:

ა) ადამიანის უფლებებისა და უსაფრთხოების მხრივ არსებული მდგომარეობა;

ბ) დაცვის განმახორციელებელი სუბიექტ(ებ)ი;

გ) დევნის ან სერიოზული ზიანის განმახორციელებელი სუბიექტ(ებ)ი;

დ) პოლიტიკური და სოციალური მდგომარეობა;

ე) საკანონმდებლო ბაზა;

ვ) კულტურული ასპექტებისა და სოციალური დამოკიდებულება;

ზ) ჰუმანიტარული და ეკონომიკური მდგომარეობა;

თ) მოვლენებისა და შემთხვევების შესახებ ინფორმაცია და გეოგრაფიული ცნობები.

4. წარმოშობის ქვეყნის შესახებ ინფორმაცია ხელმისაწვდომი უნდა იყოს წერილობითი, ხმოვანი, დასურათებული ან სხვა ფორმით, ასევე გააზრებადი, გასაგები ან გასაგებ ენაზე ნათარგმნი.

### **მუხლი 3. წარმოშობის ქვეყნის შესახებ ინფორმაციის მიზნები**

1. წარმოშობის ქვეყნის შესახებ ინფორმაციის მიზანია, დაეხმაროს სტატუსის დამდგენ სპეციალისტებს თავშესაფრის მაძიებლის ან საერთაშორისო დაცვის მქონე პირის წარმოშობის ქვეყანაში (მოქალაქეობის არმქონე პირის შემთხვევაში ყოფილი მუდმივი ბინადრობის ქვეყანაში) არსებული ადამიანის უფლებების, უსაფრთხოების, პოლიტიკური, კულტურული, სოციალური, ჰუმანიტარული და ეკონომიკური მდგომარეობის, საკანონმდებლო ბაზის, მოვლენებისა და შემთხვევების შეფასებაში.

2. წარმოშობის ქვეყნის შესახებ ინფორმაცია გამოიყენება თავშესაფრის პროცედურაში ჩართული მხარის მიერ. წარმოშობის ქვეყნის შესახებ ინფორმაცია ეხმარება სტატუსის დამდგენ სპეციალისტს თავშესაფრის მაძიებელთან გასაუბრების მომზადების პროცესში, გასაუბრებისას და ლტოლვილის ან ჰუმანიტარული სტატუსის მინიჭების ან მინიჭებაზე უარის თქმის, ასევე საერთაშორისო დაცვის მქონე პირისათვის მინიჭებული სტატუსის შეწყვეტის, გაუქმების ან ჩამორთმევის თაობაზე დასკვნის და გადაწყვეტილების

მომზადების პროცესში; წარმოშობის ქვეყნის შესახებ ინფორმაცია გამოიყენება თავშესაფრის მაძიებლის მიერ წარმოდგენილი ინფორმაციის ჯვარედინი გადამოწმებისთვის და სანდოობის შეფასებისას.

3. წარმოშობის ქვეყნის შესახებ ინფორმაცია უნდა პასუხობდეს ორი ტიპის შეკითხვას: „საერთაშორისო დაცვის შესახებ“ საქართველოს კანონის მე-15 ან მე-19 მუხლებით განსაზღვრული გარემოებებთან დაკავშირებული შეკითხვები ან/და თავშესაფრის მაძიებლის სანდოობასთან დაკავშირებული შეკითხვები.

ა) „საერთაშორისო დაცვის შესახებ“ საქართველოს კანონის მე-15 ან მე-19 მუხლებით განსაზღვრული გარემოებებთან დაკავშირებული კითხვები უნდა უკავშირდებოდეს საერთაშორისო დაცვაზე განცხადებას. კითხვები ეხება განმცხადებლის შიშს, განიცდიდეს დევნას „ლტოლვილთა სტატუსის შესახებ“ 1951 წლის კონვენციაში ასახული 5 ნიშნიდან ერთი ან რამდენიმე ნიშნის საფუძველზე, რაც წარმოადგენს ლტოლვილის სტატუსის მინიჭების საფუძველს; ან სერიოზული ზიანის რეალური რისკის არსებობას, რაც წარმოადგენს ჰუმანიტარული სტატუსის მინიჭების საფუძველს. კითხვების მიზანია, სტატუსის დამდგენმა სპეციალისტმა მიიღოს ინფორმაცია, რომელიც მას დაეხმარება იმ რისკების შეფასებაში, რომლის წინაშეც შესაძლოა აღმოჩნდეს თავშესაფრის მაძიებელი ან საერთაშორისო დაცვის მქონე პირი თავისი წარმოშობის ქვეყანაში დაბრუნების შემთხვევაში.

ბ) სანდოობის შეფასებისას ხდება მტკიცებულებათა გაანალიზება მათი დეტალურობის, კონკრეტულობის, თანმიმდევრულობის, წარმოშობის ქვეყნის შესახებ ინფორმაციასთან შესაბამისობისა და ზოგადი სანდოობით. თავშესაფრის მაძიებლის სანდოობის შეფასების მიზნით მოთხოვნილი წარმოშობის ქვეყნის შესახებ ინფორმაცია შეიძლება ეხებოდეს საერთაშორისო დაცვაზე განცხადებაში წარმოდგენილ კონკრეტულ მოვლენებს, პიროვნებებს ან მდგომარეობას.

#### **მუხლი 4. სტატუსის დამდგენი სპეციალისტის პასუხისმგებლობა წარმოშობის ქვეყნის შესახებ ინფორმაციის კუთხით**

4.1.1. სტატუსის დამდგენი სპეციალისტი ახდენს საერთაშორისო დაცვაზე განცხადების ძირითადი საკითხების იდენტიფიცირებას.

4.1.2. სტატუსის დამდგენი სპეციალისტი ახდენს კვლევის კითხვების ფორმულირებას საერთაშორისო დაცვაზე განცხადებაში წარმოდგენილი ფაქტების შესახებ..

## **მუხლი 5. თავშესაფრის მამიებელ პირთა წარმოშობის ქვეყნის შესახებ ინფორმაციის მოპოვების განყოფილების პასუხისმგებლობები**

1. წარმოშობის ქვეყნის შესახებ ინფორმაციის მოპოვების განყოფილების ძირითადი ამოცანაა წარმოშობის ქვეყნის შესახებ ინფორმაციის კვლევა. განყოფილება იკვლევს სტატუსის დამდგენი სპეციალისტის მიერ დასმულ კითხვაში წამოჭრილ საკითხებს და ამზადებს შესაბამის პასუხს.
2. წარმოშობის ქვეყნის შესახებ ინფორმაციის მოპოვების განყოფილება პასუხისმგებელია სტატუსის დამდგენი სპეციალისტისთვის რელევანტურ წარმოშობის ქვეყნებში მიმდინარე მოვლენების შესახებ განახლებული ინფორმაციის მიწოდებაზე.
3. წარმოშობის ქვეყნის შესახებ ინფორმაციის მოპოვების განყოფილება აგროვებს რელევანტურ, ობიექტურ და განახლებულ ინფორმაციას დასმულ კითხვაში წამოჭრილი საკითხების შესახებ. წარმოშობის ქვეყნის შესახებ ინფორმაციის მოპოვების განყოფილებამ კვლევის შედეგები უნდა წარადგინოს წარმოშობის ქვეყნის შესახებ ინფორმაციის კვლევის სპეციალისტების პირადი მოსაზრებებისა და დასკვნების გარეშე.

## **მუხლი 6. წარმოშობის ქვეყნის შესახებ ინფორმაციის მოთხოვნა, კვლევა და ინფორმაციის გაზიარება**

1. სტატუსის დამდგენი სპეციალისტი, წარმოშობის ქვეყნის შესახებ ინფორმაციის მოთხოვნის მიზნით, წარმოშობის ქვეყნის შესახებ ინფორმაციის კვლევის სპეციალისტს მიმართავს თავშესაფრის მამიებელთა და საერთაშორისო დაცვის მქონე პირთა მონაცემთა ბაზის გამოყენებით, სადაც ახდენს წარმოშობის ქვეყნის იდენტიფიცირებას, საკვლევი თემების და კვლევის კითხვების ფორმულირებას და კითხვებზე პასუხის მიღების საბოლოო თარიღის განსაზღვრას.
2. თუ კითხვა არ არის მკაფიოდ ჩამოყალიბებული და გასაგები, წარმოშობის ქვეყნის შესახებ ინფორმაციის კვლევის სპეციალისტი სტატუსის დამდგენ სპეციალისტთან აზუსტებს წარმოშობის ქვეყნის შესახებ ინფორმაციის კითხვებს.
3. კვლევის კითხვებისგაცნობის შემდეგ, წარმოშობის ქვეყნის შესახებ ინფორმაციის კვლევის სპეციალისტი, კვლევის კითხვებში წამოჭრილი საკითხების შესახებ აგროვებს არსებულ და ხელმისაწვდომ ინფორმაციას.
4. წარმოშობის ქვეყნის შესახებ ინფორმაციის კვლევის სპეციალისტი ინფორმაციას აგროვებს და იკვლევს ამ დოკუმენტის მე-10 მუხლით გათვალისწინებული ხარისხის სტანდარტების დაცვით. მოპოვებული ინფორმაცია აისახება წარმოშობის ქვეყნის შესახებ ინფორმაციის ანგარიშში.

5. წარმოშობის ქვეყნის შესახებ ინფორმაციის კვლევის სპეციალისტი კვლევის ანგარიშს სტატუსის დამდგენ სპეცისლისტებს უზიარებს თავშესაფრის მაძიებელთა და საერთაშორისო დაცვის მქონე პირთა მონაცემთა ბაზის მეშვეობით, შემდეგი ფორმის გამოყენებით:



**თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილება**

საქართველოს ოკუპირებული ტერიტორიებიდან იძულებით გადაადგილებულ პირთა, განსახლებისა და ლტოლვილთა სამინისტრო

<b>წარმოშობის ქვეყანა:</b>	
<b>კვლევის კითხვების ავტორი:</b>	<b>კვლევის კითხვებზე პასუხის ავტორი:</b>
<b>დაწესებული საბოლოო თარიღი:</b>	<b>პასუხის მომზადების თარიღი:</b>
<b>კვლევის კითხვები:</b>	
<p><b>დათქმა</b> - წინამდებარე ინფორმაცია მომზადებულია თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილების სტანდარტული ოპერაციული პროცედურების დოკუმენტის და საერთაშორისოდ აღიარებული სტანდარტების შესაბამისად. ინფორმაცია მომზადებულია საჯარო ან/და წარმოშობის ქვეყნის შესახებ ინფორმაციის მოპოვების განყოფილებისთვის მოცემულ მომენტში ხელმისაწვდომი ინფორმაციის გამოყენებით, დამუშავებულია მაქსიმალური ყურადღებით და შეზღუდულ დროში. აღნიშნული დოკუმენტი არ არის ამომწურავი ან შემაჯამებელი ან გადაამწყვეტი საერთაშორისო დაცვაზე გადაწყვეტილების მიღებისთვის. თუ რაიმე მოვლენა, რომელიმე პიროვნება ან ორგანიზაცია არ არის ნახსენები წინამდებარე ინფორმაციაში, ეს არ ნიშნავს იმას, რომ მოვლენას ადგილი არ ჰქონია ან პიროვნება ან ორგანიზაცია არ არსებობს. გამოყენებული ტერმინოლოგია არ უნდა იქნას მიჩნეული რაიმე სამართლებრივი პოზიციის განმსაზღვრელად. წინამდებარე ინფორმაცია არ წარმოადგენს წარმოშობის ქვეყნის შესახებ ინფორმაციის მოპოვების განყოფილების მოსაზრებას ან პოლიტიკურ განცხადებას. ინფორმაციის სამიზნე</p>	

აუდიტორიას წარმოადგენენ სტატუსის დამდგენი სპეციალისტები, წარმოშობის ქვეყნის შესახებ ინფორმაციის კვლევის სპეციალისტები, გადაწყვეტილების მიმღები პირები, იურისტები, მოსამართლეები და თავშესაფრის პროცედურაში ჩართული მხარეები.

## მუხლი 7. წარმოშობის ქვეყნის შესახებ ინფორმაციის ვებ-გვერდი

1. წარმოშობის ქვეყნის შესახებ ინფორმაციის ვებ-გვერდი არის თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილების ვებ-გვერდი, სადაც საჯარო სივრცეში თავმოყრილია განყოფილების მიერ მოძიებული ყველა სახის ინფორმაცია. ვებ-გვერდის მიზანია, განყოფილების მიერ მომზადებულ ინფორმაციაზე წვდომა გაუადვილოს თავშესაფრის საკითხებზე მომუშავე მოსამართლეებს, სამართლებრივ კონსულტანტებს და თავშესაფრის პროცედურაში ჩართულ მხარეებს.
2. თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილება წარმოშობის ქვეყნის შესახებ ინფორმაციას საჯაროდ აზიარებს შემდეგი ფორმით:



### თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილება

საქართველოს ოკუპირებული ტერიტორიებიდან იძულებით გადაადგილებულ პირთა, განსახლებისა და ლტოლვილთა სამინისტრო

## დათქმა

წინამდებარე ინფორმაცია მომზადებულია თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილების სტანდარტული ოპერაციული პროცედურების დოკუმენტის და საერთაშორისოდ აღიარებული სტანდარტების შესაბამისად. ინფორმაცია მომზადებულია საჯარო ან/და წარმოშობის ქვეყნის შესახებ ინფორმაციის მოპოვების განყოფილებისთვის მოცემულ მომენტში ხელმისაწვდომი ინფორმაციის გამოყენებით, დამუშავებულია მაქსიმალური ყურადღებით და შეზღუდულ დროში. აღნიშნული დოკუმენტი არ არის ამომწურავი ან შემაჯამებელი ან გადამწყვეტი საერთაშორისო დაცვაზე გადაწყვეტილების მიღებისთვის. თუ რაიმე მოვლენა, რომელიმე პიროვნება ან ორგანიზაცია არ არის ნახსენები წინამდებარე ინფორმაციაში, ეს არ ნიშნავს იმას, რომ მოვლენას ადგილი არ ჰქონია ან პიროვნება ან ორგანიზაცია არ არსებობს. გამოყენებული ტერმინოლოგია არ უნდა იქნას მიჩნეული რაიმე სამართლებრივი პოზიციის განმსაზღვრელად. წინამდებარე ინფორმაცია არ წარმოადგენს წარმოშობის ქვეყნის შესახებ ინფორმაციის მოპოვების განყოფილების მოსაზრებას ან პოლიტიკურ განცხადებას. ინფორმაციის სამიზნე აუდიტორიას წარმოადგენენ სტატუსის დამდგენი

სპეციალისტები, წარმოშობის ქვეყნის შესახებ ინფორმაციის კვლევის სპეციალისტები, გადაწყვეტილების მიმღები პირები, იურისტები, მოსამართლეები და თავშესაფრის პროცედურაში ჩართული მხარეები.

### წინამდებარე ინფორმაციის მომზადების თარიღი -

დამატებითი ინფორმაციისთვის მიმართეთ თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილებას ელექტრონულ მისამართზე

[coi@mra.gov.ge](mailto:coi@mra.gov.ge)

### მუხლი 8. წარმოშობის ქვეყნის შესახებ ინფორმაციის ბიბლიოთეკა

1. წარმოშობის ქვეყნის შესახებ ინფორმაციის ბიბლიოთეკა არის თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილების მიერ დაფუძნებული და ადმინისტრირებული ბიბლიოთეკა, რომელიც აერთიანებს სამეცნიერო ლიტერატურას წარმოშობის ქვეყნების, საერთაშორისო დაცვისა და მიგრაციული პროცესების შესახებ.

2. წარმოშობის ქვეყნის შესახებ ბიბლიოთეკის მიზანია ხელი შეუწყოს სტატუსის დამდგენი სპეციალისტების, სამართლებრივი კონსულტანტების და თავშესაფრის პროცედურაში ჩართული მხარეების ინფორმირებულობის ზრდას.

### მუხლი 9. წარმოშობის ქვეყნის შესახებ ინფორმაციის კვლევის მეთოდოლოგია

1. წარმოშობის ქვეყნის შესახებ ინფორმაციის კვლევის სპეციალისტი აყალიბებს სტრატეგიას, რომლის მიხედვითაც წარმართავს კვლევის პროცესს. სტრატეგიის დახმარებით, კვლევის სპეციალისტი ეფექტურად ანაწილებს დროს, განსაზღვრავს კვლევისთვის საჭირო წყაროებს, ფოკუსირებული რჩება კვლევის კითხვაზე, მარტივად გამოყოფს არასაჭირო ინფორმაციას და დროულად აფიქსირებს კვლევის უშედეგობას.

2. წარმოშობის ქვეყნის შესახებ ინფორმაციის კვლევის სპეციალისტი კვლევის პროცესში ინფორმაციას მოიპოვებს ვებ-სივრცეში არსებული პუბლიკაციების გამოყენებით - სპეციალიზირებული წყაროები, წარმოშობის ქვეყნის შესახებ ინფორმაციის სპეციფიკური მონაცემთა ბაზები, გლობალური ინტერნეტ სამიებო სისტემები, მედია აქრივები, რუქები და ინტერნეტ წიგნები.

3. წარმოშობის ქვეყნის შესახებ ინფორმაციის კვლევის სპეციალისტი კვლევის პროცესში ინფორმაციას მოიპოვებს არა ვებ-რესურსების გამოყენებით - წარმოშობის ქვეყნის შესახებ ინფორმაციის მოპოვების განყოფილების ბიბლიოთეკები, უნივერსიტეტებისა და სხვა აკადემიური ბიბლიოთეკები.

4. წარმოშობის ქვეყნის შესახებ ინფორმაციის კვლევის სპეციალისტი კვლევის პროცესში ინფორმაციას მოიპოვებს პირველწყაროსა და ფაქტების მოძიების მისიების გამოყენებით - ექსპერტები, აკადემიური ცოდნის მქონე პირები, არასამთავრობო და საერთაშორისო ორგანიზაციები, სამთავრობო წარმომადგენლობები და ჟურნალისტები.

5. წარმოშობის ქვეყნის შესახებ ინფორმაციის კვლევის სპეციალისტი კვლევის პროცესში მოძიებული ინფორმაციის სიზუსტეს ამოწმებს წყაროების სანდოობის შეფასებითა და ჯვარედინი გადამოწმების მეთოდით სხვადასხვა ხელმისაწვდომი წყაროს გამოყენებით.

6. წარმოშობის ქვეყნის შესახებ ინფორმაციის კვლევის სპეციალისტი, ვალდებულია დაიცვას კონფიდენციალურობისა და პერსონალური მონაცემების დაცვის პრინციპები.

### **მუხლი 10. ხარისხის სტანდარტი**

1. წარმოშობის ქვეყნის შესახებ ინფორმაცია, რომელიც გამოიყენება საერთაშორისო დაცვის მინიჭების გადაწყვეტილების მიღების პროცესში, უნდა იყოს რელევანტური, ლტოლვილთა და ადამიანის უფლებათა კანონმდებლობის სამართლებრივ ასპექტებზე ან/და საერთაშორისო დაცვაზე განცხადებიდან გამომდინარე შეკითხვებზე დაფუძნებული.

2. წარმოშობის ქვეყნის შესახებ ინფორმაცია, რომელიც გამოიყენება საერთაშორისო დაცვის მინიჭების გადაწყვეტილების მიღების პროცესში, მოძიებული უნდა იყოს სანდო წყაროებიდან, გათვალისწინებული უნდა იყოს წყაროს პოლიტიკური და იდეოლოგიური კონტექსტი, მანდატი, ინფორმირების მეთოდოლოგია და მოტივაცია. ვინაიდან თითოეულ წყაროს გააჩნია საკუთარი პერსპექტივა და ფოკუსირება, დაბალანსებული და შესაძლო სრულყოფილი შედეგის მისაღწევად, აუცილებელია სხვადასხვა ტიპის წყაროების გამოყენება.

3. წარმოშობის ქვეყნის შესახებ ინფორმაცია, რომელიც გამოიყენება საერთაშორისო დაცვის მინიჭების გადაწყვეტილების მიღების პროცესში, უნდა იყოს ზუსტი და უახლესი გადაწყვეტილების მიღების დროისთვის. ინფორმაციის სიზუსტე შეიძლება მიღწეული იყოს ჯვარედინი გადამოწმების პრინციპის საფუძველზე სხვადასხვა წყაროს გამოყენებით.

4. გამჭვირვალობის უზრუნველყოფის მიზნით, წარმოშობის ქვეყნის შესახებ ინფორმაცია, სრულად უნდა იყოს დამოწმებული წყაროებით და მკითხველს აძლევდეს საშუალებას, დამოუკიდებლად შეაფასოს და შეამოწმოს ინფორმაცია. ინფორმაცია სრულად უნდა შეესაბამებოდეს გამოყენებულ წყაროს, უნდა იყოს გასაგებ ენაზე მომზადებული და არ უნდა მოხდეს მისი მნიშვნელობის დამახინჯება.



5. წარმოშობის ქვეყნის შესახებ ინფორმაციის კვლევა უნდა წარიმართოს ნეიტრალურად. წარმოშობის ქვეყნის შესახებ ინფორმაციის კვლევის სპეციალისტი უნდა იყოს მიუკერძოებელი.

6. წარმოშობის ქვეყნის შესახებ ინფორმაციის კვლევის პროცესში მოძიებული ინფორმაციისა და მომზადებული ანგარიშების ხარისხის კონტროლს ახორციელებს თავშესაფრის მაძიებელ პირთა წარმოშობის ქვეყნის შესახებ ინფორმაციის მოპოვების განყოფილების უფროსი.

### **მუხლი 11. წარმოშობის ქვეყნის შესახებ ინფორმაციის საზღვრები**

1. **წარმოშობის ქვეყნის შესახებ ინფორმაცია არ წარმოადგენს რისკების შეფასებას** - წარმოშობის ქვეყნის შესახებ ინფორმაციის კვლევა უნდა მოიცავდეს ინფორმაციის შეგროვებას, დახარისხებას და წყაროების შეფასებას. რისკების შეფასება წარმოშობის ქვეყნის შესახებ ინფორმაციის საფუძველზე წარმოადგენს წარმოშობის ქვეყნის შესახებ ინფორმაციის გამოყენების ასპექტს.

2. **წარმოშობის ქვეყნის შესახებ ინფორმაცია არ არის დასკვნა** - წარმოშობის ქვეყნის შესახებ ინფორმაცია ეხმარება სტატუსის დამდგენ სპეციალისტს საერთაშორისო დაცვის საჭიროებისა და შესაძლო დევნის ან სერიოზული ზიანის რეალური რისკის საფრთხეების შეფასებისას.

3. **წარმოშობის ქვეყნის შესახებ ინფორმაცია ხშირად ძალიან ზოგადი ხასიათისაა** - წარმოშობის ქვეყანაში ადამიანის უფლებების მხრივ არსებული მდგომარეობის შესახებ ზოგადი ინფორმაცია ადვილად ხელმისაწვდომია, მაგრამ გაცილებით რთულია ინფორმაციის მოძიება კონკრეტული გარემოებების შესახებ (ასეთი ინფორმაცია, შეიძლება, საერთოდ არ იყოს ხელმისაწვდომი). ზოგადი ფაქტების შესახებ ხელმისაწვდომია ბევრი ანგარიში თუ სტატია მაშინ, როცა კონკრეტული ფაქტებისა და ადამიანების შესახებ ინფორმაციის მოძიება ძალიან რთულია და ხშირად შეუძლებელიც თუ აღნიშნული ფაქტები და ადამიანები არ არიან საყოველთაოდ ცნობილი. თუ ინფორმაცია მაინც მოიპოვება, ხშირად, ასეთი ინფორმაცია მომდინარეობს საექვო წყაროებიდან და მათზე დაყრდნობა არ შეესაბამება ხარისხის სტანდარტების მოთხოვნებს.

4. **წარმოშობის ქვეყნის შესახებ ინფორმაციის არარსებობა** - არსებობს მრავალი მიზეზი, რატომაც შესაძლებელია, რომ წარმოშობის ქვეყნის შესახებ ინფორმაცია საერთოდ არ მოიპოვებოდეს; რაც უფრო მძიმეა ქვეყანაში არსებული მდგომარეობა, მით უფრო რთულია ინფორმაციის მოპოვება დაწესებული შეზღუდვების გამო მედია საშუალებებისთვის და ადამიანის უფლებების დამოუკიდებელი მონიტორინგის მისიებისთვის.

5. **ენობრივი ბარიერი** - წარმოშობის ქვეყნის შესახებ ინფორმაციის დოკუმენტების უმეტესობა ინგლისურ ენაზეა. წარმოშობის ქვეყნის შესახებ ინფორმაცია, რომელიც ქვეყნდება ადგილობრივ ენებზე ხშირად ხელმიუწვდომელია მათთვის, ვინც არ ფლობს ამ ენებს.

## **მუხლი 12. წარმოშობის ქვეყნის შესახებ ინფორმაციის მოპოვების ვადები**

1. წარმოშობის ქვეყნის შესახებ ინფორმაციის კვლევის სპეციალისტი ინფორმაციას მოიპოვებს სტატუსის დამდგენი სპეციალისტის მიერ დაწესებულ ვადებში.
2. პასუხის მომზადებისთვის უნდა დაწესდეს გონივრული ვადები კითხვის ხასიათიდან გამომდინარე და არ უნდა იყოს 5 სამუშაო დღეზე ნაკლები.
3. პასუხის მომზადებისთვის 5 სამუშაო დღეზე ნაკლები ვადა შეიძლება დაწესდეს სტატუსის დადგენის განყოფილების უფროსისა და წარმოშობის ქვეყნის შესახებ ინფორმაციის მოპოვების განყოფილების უფროსის შეთანხმების საფუძველზე.
4. წარმოშობის ქვეყნის შესახებ ინფორმაციის კვლევის სპეციალისტი, წარმოშობის ქვეყნის შესახებ ინფორმაციის მოპოვების განყოფილების უფროსთან შეთანხმებით, აფიქსირებს კვლევის უშედეგობას და ამის შესახებ აცნობებს სტატუსის დამდგენ სპეციალისტს კვლევის უშედეგობის დადგენისთანავე, მაგრამ არა უგვიანეს ვადის ამოწურვამდე 1 სამუშაო დღისა.